

滇雲歷年傳

漁父傳卷四

雲南叢書

吳昌老人元說輯

曾孫慎樞梅岑恭校

起唐高祖武德元年盡五代周顯德六年

南詔蒙氏細奴邏卽習農樂九隆五族牟苴薦之三
十六世孫也其父蒙迦獨卽龍迦獨母摩黎羌名沙
壹居哀牢山下捕魚爲生一日忽於水中觸一沉木
感而有娠度十月生子男十人後木化龍出謂沙壹
曰若爲我生子今何在九子見龍驚走獨一小子不
去背龍而坐龍舐其背因與龍背坐名之曰九隆九
譯背隆譯坐細農樂頗有神異衆推爲王又有奴波

息生十女子習農樂兄弟分娶之武侯南征封龍佑
那賜姓張其餘董洪段施何王楊李趙九姓必是一
時所賜蓋因十兄弟而賜之十姓也先是細奴邏同
其父龍迦獨避難從哀牢山至蒙耕於巍山之麓細
奴邏數有神異孳牧蕃息部衆日盛時張樂進求爲
雲南大首領因祭鐵柱鐵柱者武侯所立歲久剝泐
進求重鑄之旣成合酋長九人祭天於柱細奴邏與
焉有鳥五色飛集於柱久之又飛憩於細奴邏左肩
衆以爲異如此者十八日鳥乃去於是衆心咸歸張
樂進求妻以女且遜位焉細奴邏拔刀斫石曰我當

爲王刀入此石遂入石三
上號大封民國稱蒙社詔時滇之稱詔者不一而蒙
社在諸詔之南故又稱南詔詔猶云君長也

蛻按先號九龍氏以兄弟九人而稱之史書不載後
之九隆謂是背坐見於後漢書習農樂卽細奴邏唐
季又有番相名悉那邏字異而音同也昔人謂夷別
音在音不在字華別字在字不在音理則然與有唐
三百餘年蒙蠻爲滇蜀巨慙理亂雖由於官人之賢
不肖而天之生此亦非偶然故節錄諸書合其同異
以列於卷首至於竹浮三節木化九隆洵如馮氏所

卷四
二
云南詔臣下誇美其祖宗彷彿吞卵履敏耳不必深求其是非

唐高祖武德元年詔改郡爲州以太守爲刺史建都督統之

遣使招降南中部落復置南寧州又置昆州恭州協州又析協州爲靖州隸戎州都督府

南蠻傳益州刺史段綸遣大施至南寧治共範川招諭諸部皆納款貢方物而兩蠻始納貢矣

詔釋爨宏達以爲昆州刺史奉父喪歸

南蠻傳隋文帝時爨翫懼討入朝帝惡其反覆殺之

而沒入其子安達爲奴唐高祖卽位釋之仍以爲昆
州刺史安達奉其父喪歸諸夷皆感附

四年以漢雲南郡地置姚州又置姚州都督府領十三
州

唐書地理志註以古滇王國民多姚姓因置姚州都
督府

五年置總管府於南寧州僑治益州

昆彌內附遣使朝貢於是西洱河一帶復通中國
蛻按昆彌卽昆明之訛音此西洱河金沙江也

七年復以南寧州爲都督府命韋仁壽檢校南寧州都

督寄治越巂

韋仁壽承制置西寧州南寧州南龍州西宗州西利州西豫州以弄棟地爲哀州八年改南寧州爲郎州復治味改恭州爲曲州

史武德初諸夷皆內附帝遣使撫之類皆貪縱時京兆韋仁壽爲巂州都督府長史有治理名帝因詔檢校南寧州都督寄治越巂歲一按行慰勞仁壽將兵五百人循西洱河開地數千里稱詔置七州十五縣蠻豪皆賓見卽授以牧宰威令簡嚴人皆安悅將還蠻長泣曰天子藉公鎮撫奈何欲去我仁壽以池壁

未立爲解諸蠻卽相率築城起廨再司畧具仁壽乃
告以實曰吾奉詔第撫循何敢擅留南中父老乃悲
啼祖行遣子弟隨貢方物天子大悅仁壽請徙治南
寧州遂撫定之詔可勅益州發兵護送刺史竇軌疾
仁壽功詠言山獠方叛未可以勤遠畧遂不遣歲餘
仁壽卒功用未成惜哉

冊張樂進求爲首領大將軍

滇史初張樂進求承龍佑那傳世號建寧國今遣使
隨韋仁壽入朝朝廷嘉之以爲首領大將軍

太宗貞觀元年罷郎州都督府

三年改西豫州爲縻州

以爨歸王爲南寧都督

滇攷韋仁壽功用不成朝廷以爨氏大姓夷衆所服
時爨宏達已死遂以其子爨歸王爲南寧州都督使
代仁壽遂開西爨蜻蛉弄棟等縣

以東謝地爲應州南謝地爲莊州西趙地爲明州皆卽
授其酋帥爲刺史

滇攷爨歸王爲刺史居石城關三年東謝蠻謝元深
南謝蠻謝強皆來朝西趙蠻趙摩率亦爲黔州豪帥
田康所諷率所部萬餘戶內附因各以其地爲州卽

援爲刺史繪王會圖以示後人四州俱隸黔州都督府

十一年以莊州爲都督府

二十二年西洱河大首領楊同外東洱河大首領楊斂皆入朝授官秩

滇攷貞觀二十年巋州大都督劉伯英上言松外諸蠻暫服亟叛請擊之上從其言明年使右武衛將軍梁建方率蜀十二州兵進討松外諸蠻其酋帥雙舍拒戰敗走殺獲十餘萬羣蠻震駭走保山谷建方遣使詣西洱河諭其帥楊威歸附者七十餘城戶十萬

九千署其首領蒙和等爲縣令復遣奇岳自巖州道
千五百里掩西瀾河蠻帥楊盛大駭欲遁去使者好
語約降乃遣首領土人納款軍門建方振旅而還於
是西瀾河大首領楊同東瀾河大首領楊斂松外首
領蒙羽等俱請入朝授官職二十五年復遣將擊西
爨蠻開靖蛉弄棟爲縣其西徙莫抵蠻儉望蠻皆來
內屬以其地置傍望覽求邱五州隸郎州都督此唐
初次第經理諸蠻之大畧也

蛻按唐初經理諸夷改易建置紛紛不一至戎州黔
州二都督之設則雲南幅員錯入於貴州四川者殊

多至今已難究詰蓋此三隅俱屬禹州外徼自無畫
定之區朝南暮北無怪其然後世志家依違遷就又
豈盡無是編全係滇雲疆索故屬在滇蜀之事概不
見之提綱其有不得不連類而及者頗於註內附書
以免淆混然荒遠之紀載無稽蠻服之文獻不足按
圖索驥就足求蛇亦未敢謂全無謬誤卽如武德三
年以謝蠻地置牂州牂牁別部置充州隸黔州督四
年又置西濮州尹州會州西平州隸戎州督又置矩
州隸黔州督又分置西寧州南寧州南龍州西宗州
西利州西豫州以弄棟地置哀州貞觀元年以南謝

蠻地置壽寧州四年又置炎州又改壽南州爲莊州
皆隸黔州督八年改西寧州爲黎州南雲州爲匡州
西平州爲盤州十一年改西濮州爲髡州南龍州爲
鉤州西宗州爲宗州西利州爲微州二十二年分郎
州地置麻州似此諸州以何地置從何處分因何事
改考地里志建置表往往互異不合雖欲正之何從
而正之且如此條松外蠻是四川邊徼自與滇雲無
涉而建方遣使道嶠州掩西瀾河於是東西大首領
相率朝貢是又滇雲事矣雖欲不書又焉得而不書
之又西洱河卽今大理之洱海卽古牂榆河也或云

卽昆明河乃金沙江別名也又云是西瀾河又作西
洱河此又有西洱河或異或同是一是二烏從而定
之耶至所置傍望求覽卽五州據滇史云求州在新
興餘四州在楚雄但徒莫儉望二蠻俱在蜻蛉弄棟
之西則以其地建州不應又在蜻蛉弄棟之東且四
州旣俱在楚雄求州何以獨越數百里更東而在新
興耶是皆不可以強定者也

高宗永徽元年建寧首領大將軍張樂進求遜位於細
奴邏遂滅張氏自號大封民國稱蒙舍詔又自稱奇王
大理志蒙氏先爲哀牢夷有九隆者雄黠衆推爲王

其裔細奴邏隨父避難耕於蒙之魏寶山數有祥異
張樂進求以國讓之細奴邏遂自立爲奇王號大蒙
白國張氏世絕時渠帥有六號曰六詔皆九隆苗裔
細奴邏居蒙氏川今蒙化府稱蒙舍詔餘爲越析詔
居麗江府浪穹詔居浪穹縣鄧賧詔居鄧川州施浪
詔居浪穹縣之瀾茨河蒙騫詔居建昌衛獨蒙舍詔
在五詔之南故又稱南詔

滇攷其時有郭郡已者爲武臣波羅旁者爲文臣又
有楊波羅者號神明大士騎青牛能知鹽泉開諸鹽
井國以富實

四年紉奴邏遣其子邏盛炎入朝詔封爲巍州刺史賜
錦袍

蛻按蒙有巍寶山是細奴邏微時耕所高宗必因此
置巍州而封之然各志竝無巍州名也細奴邏立三
年而始遣子入朝鶩驚已甚而執言正詞以討之者
無人焉永徽承貞觀之餘烈而王剛不振如此可嘆
矣附南詔野史叙細奴邏事節畧細奴邏卽位改元
大封用澂江人郭郡矣爲開國武臣波羅旁爲輔國
文臣號楊波遠爲神明大士察鹽泉開鹽井是年唐
僧西天取經細奴邏平地祀岳瀆封先世五賢七聖

以蒙苴薦爲始祖至永徽四年子羅晟入朝始受唐
封遵唐正朔顯慶二年丁巳唐僧取經與佛像回過
點蒼山遇雨濕經曬於坡間今名曬經坡是年有彩
鳳鳴於鄧川遺一羽焉今名鳳羽鄉以此觀之細奴
邏雖蠻夷篡竊而其篡立之初用人理財尊祖敬宗
亦似稍知大體者此其所以能統諸夷而據有之者
乎載考聖教序取經回高宗猶在青宮三藏曬經坡
乃附會之事不足信也

五年巍州刺史細奴邏復遣羅盛炎入朝謝錫命
大敦弄酋楊承顛煽亂以左領軍將軍趙孝祖爲郾州